

四庫全書

集部

欽定四庫全書

五百家播芳大全文粹卷十

宋 魏齊賢

葉 茶同輯

賀啓

簽樞

賀虞簽書啓

代

熊子復

伏審召自輔藩擢於樞筦方天子振旅將巡於邊陲宜

人傑運籌決勝於幃幄師氣已倍敵情莫逃郵置初傳  
道塗相慶竊以建隆之分宥府實並都臺興國之置簽  
書通為執政必陞華於秘殿以借重於機廷昔聞典故  
之存今見老成之用恭惟樞密才豪一代名震四夷羽  
扇綸巾却大敵笑談之易雕戈錫旃制上流經理之勞  
比屬多虞正資遠畧雖作藩於近甸亦蒙福於京師必  
本柄於中樞乃基命於宥密果膺帝簡越贊神謨用儒  
雅章句而先武夫昔觀已試遣將帥戍役而衛中國今

仰成謀豈惟折千里之衝方將建萬世之策某猥縻原  
隰阻拜門牆廟筭不遺相契沈機之運台衡有待倚需  
渙號之揚

賀王簽書啓

馬子才

渙號王庭對揚天子之命叅謨樞府簡在上帝之心聲  
名推重於朝廷華夏想聞其風采凡依德宇舉極歡心  
竊惟樞柄之臣始自唐宗之制朱梁易之為崇政石晉  
更以為宣徽分南院北院之稱有正使副使之任名雖

異致理實同條迨我宋之隆興鑒前朝之得失兼置簽  
書之職並為執政之官蓋將總禦於藩戎抑亦參詳於  
機密安危所係授受非輕自非才畧兼優之人曷副聖  
神注委之意廣謀庶位果得宗工恭惟某官識造淵微  
學窮元本仰天庭而覩星辰之小浮滄海而知江湖之  
汙六藝折衷於仲尼萬事不問於伯始仁經義緯蘊和  
順以積中玉振金聲致英華之發外確爾自守介然不  
移其為氣也至剛有諸已之謂信青雲得路搏九萬里

之扶搖紫綬重金際一千齡之會遇頃從近列浸陟  
華津振耳目於烏臺聳威稜於風憲巍巍然泰山北  
斗無得踰焉凜凜如烈日嚴霜真可畏也身既與名  
而俱顯功因得位以彌昭爰辱眷知亟叅樞要內以  
制於羣牧外以鎮於四夷形勢強而王室尊賢能用  
而天下治綸言誕布輿論允諧行慶九遷即登三事  
如某者么麼細行運蹇浮生頃緣都下之遊獲識荆  
州之面傾蓋如故陳義甚高茲聞台座而登庸竊偶

藩符而出守潭潭公府方欣仰託於帡幪六六錦鱗敢  
後欽脩於竿牘

使相

賀蔡開府啟

翟公巽

視秩公槐增華將鉞官儀鷗尾共瞻黃閣之崇命數蟬  
冠咸仰黑頭之拜傳聞四遠頌歎一詞昔者周公之勲  
封伯禽於魯國康公維翰命召虎於淮夷然而伯禽無  
豫於成功召虎克承於先世猶且寫諸琬琰播在聲詩

豈有述作萃於一門事業煥乎當代朝廷無出其右簡  
在帝心父子同升諸公貴窮人爵袞衣焜耀而交映草  
履差池而後先稽叅舊聞曠絕無輩恭惟相公身兼數  
品德範羣倫方當強仕之年已佇登庸之望曲臺舊典  
潤色倚以告成東觀諸儒總領資其折衷迨茲顯拜誰  
曰不宜某夙荷眷知獨傾意氣七登三事願觀伯始之  
榮四世五公當繼諸袁之盛

八座

吏書  
工書

戶書

禮書

兵書

刑書



賀蔡吏書啟

趙德莊

伏審益簡清衷晉疏華渚冠睥兩禁繼嘉祐之祖風總  
職四銓舉元豐之帝典與情允協瑰望愈隆竊以八座  
貴而非賢莫居實亞機衡之任六卿備而各率其屬首  
嚴銓總之司唯已試之效則流品自分必久次之英則  
號名乃正眷焉甚重允也才難恭惟吏部尚書粵學家  
傳懿文古作早膺妙注徧歷要塗擢貳版曹著元和之  
國計越居選部揚行儉之能名果遷常伯之尊益致本

朝之重尚書之為喉舌寢具師瞻執政之猶股肱佇顙  
國秉其猥叅漕指逖聽除音莫陪賓客之趨曷勝寤寐  
之喜

賀張吏書啟

肅膺帝制進長天官叅八座之高華領三千之要劇除  
音騰播公論愉欣竊以任法不如任人清議存則風俗  
可變用儒無如用舊老成進則朝廷自尊矧惟四銓之  
司實冠六卿之職治源所出人弊相仍自非一代之者

英曷稱九流之宗主恭惟某官芳猷世濟高韻天成早  
騰宇宙之名峻陟雲霄之路致身九陛言正大以無私  
去國十年氣方剛而不撓頃從留鑰亟奉賜環晁旒渴  
見於儀刑紳紱想聞於風采謂正人之見用斯治世之  
可期宣室受釐奚止賈生之對東山堅臥肯容謝傅之  
高得行則行何恙不已趨勸路門之講聊從真館之遊  
旋被湛恩復還舊物官聯在昔是為家宰之尊帝眷於  
今必倚宗臣之重即登三事以器百工某年顏寢衰志

氣益落念報國之無補欲歸田而未能拭目以觀喜用  
鄉人之善彈冠何敢惟求老者之安

賀王吏書啟

李粹伯

召還瑣闥資論駁之清規擢進銓曹付品題之重柄一  
紆印綬萬集簪纓定權稱於胸中運甄陶於筆下屬叨  
英盼倍切懽悰恭惟某官德量涵空神鋒脫穎坐仙山  
而直釣掣盡六鰲望阿閣以來巢厓低三鳳白晷難辨  
赤汗俱高雍容方躡於禁林簡拔即登於法從旋聞授

鉞出試名藩保釐未著於東郊疆理先周於南海龍韜  
寢著虎帳屢移輟溫洛之除書分廣陵之節帥席猶未  
煖車已戒行八鸞喑喑詠遄歸於山甫四牡奕奕歌入  
覲於韓侯戛百僚鳴佩之音恢九載望雲之意對揚  
文陛密契淵衷探公論之盈庭勞巨儒之典選青錢學  
士聲華已茂於昔時黑頭尚書班序正聯於今日渭清  
涇濁韶美鄭謠皆曲盡於見聞終難欺於去取前馬裴  
而後盧李豈足擬倫左稷高而右皋夔佇觀並列某久

睽恩館窮處瘴鄉慚教職之無功誤薦章之及格敢投  
知遇曲借生成瞻鸛鵲之摩天莫攀迅翼起鸞鳩於控  
地全賴高風

賀溫吏書啟

王宣子

誕膺明制峻陟近班朝野交歡人神胥慶竊以周頒六  
典首登太宰之官漢設四曹並建尚書之位魏崇八座  
而名叅乎僕射唐列三銓而事領於宰臣蓋端右之秘  
居實殿中之峻秩布宣王命允為喉舌之司綜柄人材

盡執銓衡之柄爰求碩德當賴宗工恭惟某官元粹在躬泰寧得運夙被凝旒之睠早歸側席之求昨東賓僚倂開王府擢在師儒之位進居保傅之官逮聖德之日躋屬珍符之神授風雲感會雨露沾濡乾健御天已應飛龍之造晉明出地徐觀庶馬之蕃眷注愈深倚毗加厚監觀往牒考驗先猷商美高宗念甘盤之舊學漢嘉成帝篤張禹之故恩果奉褒俞亟叅法從絳衣蒼珮典禮奉常青瑣黃扉居中給事侍金華之經幄領王府之

書林僉謂該通衆推博雅越從嚴近日正浩穰惟千里  
之都畿示四方之表則發奸摘伏賴廣漢之嚴明扶弱  
抑強有孟容之威望未周歲籥已奏功書遽陞常伯之  
崇仍冠選曹之重士論惟允帝心所嘉進善拔賢共仰  
山濤之識揚清激濁皆推毛玠之風佇奉經綸入調鼎  
鼎上紓遠業俯慰羣情某章句陋儒斗筭賤役賀厦之  
燕但切安巢之心在釣之泥即歸造物之日

賀韓戶書啟

陸務觀



伏審祇奉峻除榮遷劇部官儀如舊尚聯常伯之班帝  
命維新全總大農之政有識交慶不謀同辭恭惟戶部  
尚書才高絕人器大經世際熙辰之千載踐華境者十  
年夜艾星稀獨長庚之有爛歲寒木落惟孤松之不凋  
蓋謀猷自簡於帝衷故遷擢式符於民望陟文昌之八  
座聊率屬於中臺煥泰階之六符佇同寅於上袞某符  
叨剖竹戍甫及瓜但切欣於得興莫趨慶於成厦仰止  
門牆之際形於寤寐之間頌歎惟勤拙訥難盡

賀楊戶書啟

顯揚帝制進長地官惟八座之尊崇接二府之嚴近士  
夫快見夷夏聳聞恭惟某官學際天人才兼文武尚識  
三朝之故老獨為一代之偉人論孔明保蜀之功得夫  
子尊周之義令行千里之外法循三尺之中強敵畏服  
其威名遠民舞歌於善政妄言欲毀於日月公心不動  
於丘山獨當聖主之知盡伐宵人之計初解印綬即賜  
佩環上意方隆下情益附某官學衰落身世浮沈猥以

鄙文夙承異獎至自補於圉吏若有愧於館人浮議盡  
消知謝傳之必起流言既辨宜周公以來歸共欣正道  
之行實為中興之兆

賀王禮書啟

陳君舉

伏審簡在嗣皇擢居常伯榮兼瑣闥既謀猷啟沃之特  
親遂直鑾坡更號令文章之可述有識交頌不謀同辭  
竊以世難得於全才人罕兼於數品而况總舜代夔龍  
之職擅漢庭賈馬之能挺出熙朝并當殊選恭惟內相

尚書妙宗道壺雄帥文壇早膺丹宸之除久典紫垣之  
詰屬謀元帥維時得頗牧於禁中果賢長城吾君置隴  
蜀於度外適茲多故正藉遠猷追鋒促還側席虛佇儀  
成長樂諸侯羣臣皆肅恭制下興元武夫悍卒亦感動  
命更資於審馭功益著於論思某幸託餘輝欣傳異渥  
曳星辰之履高華已冠於清班紀日月之常久大方期  
於相業

賀傳禮書啟

汪彥章

光奉贊書進班常伯唯時改作須大儒專禮樂之司以  
類俱升宜宿望次公台之任訓辭優寵班列清明恭惟  
某官厚德鎮浮高文行遠氣得古人之剛大學兼天下  
之中庸自得位於朝廷即留心於人物力加慰薦每推  
轂有味其言自處安恬或積薪後來者上昨屬殊鄰之  
擾上貯當宁之憂唯公克念於生靈無日不謀於宗社  
處雷霆之下密輸忠讜之惓惓揭日月而行恥事功名  
之赫赫果膺眷命首付彝章舜官尤重於秩宗漢爵莫

榮於稷嗣將萬世維扶之是賴何一時康濟之足言某  
久託餘光欣聞盛事方隨宦牒望門牆無布武之階竊  
讀除書喜賢者有得時之慶

賀孫兵書啟

周 邦

堯殿十行夙被絲綸之渥漢家八座晉膺綱紀之權統  
武部之五兵行司馬之九伐協贊文昌之政望樓目斷  
於天邊親逢廊廟之知拜命恩先於日午卓爾不世出  
之佐應乎大人造之朝恭惟尚書兵部道義高明智謀

沈遠胸中學海可納禹貢之九河筆下詞鋒能敵單于  
之萬騎養氣識若七年之杞梓收功名如一日之驛駒  
譽播青錢再冠詞科之選身遊紅藥爭觀詰令之嚴恥  
將赤子以事戎夷獨發大忠而顧社稷匈奴無事何勞  
實氏之遠征華夏旣寧果念曲江之先識亟奉紫泥之  
詔進趨青瑣之班著兩朝蹇諤之聲冠百僚倚毗之厚  
駢膺睿眷峻陟夏官梁帝之用明少遐實繫朝廷之重  
唐宗之擢令狐楚能清軍國之姦數獻謀猷頃清綱轄

青雲路緊已登六部之尚書黃屋恩濃更擁重金之寶  
帶某濫綴門牆之日久側聞除目而喜深慶九萬之程  
已鄰鳳沼歎差池之羽尚在雞羣簿書換文史之心  
覽庫供江山之眼輒憑竿牘抒寫肺腸聖君儉朴以化民  
攬收六合之豪傑我公忠純而致主定臻一代之太平  
豈止伏伽之作誼臣重見叔敖之為賢相薰風滿於舜  
綺畏日永於羲輪善護寢興前膺休寵

賀王兵書啟

張子韶



伏審嚳庸東掖率屬南宮常伯寵優佩錐成之寶劔司  
戎職峻偃太乙之靈旗鄰宰鉉以平躋冠從塗而絕擬  
有識交頌不謀同辭竊以祈父王之爪牙周蓋顯於九  
伐尚書帝之喉舌漢實次於三公自開西府以本兵第  
列南宮而分職然裕陵肇脩官制猶虛位於夏卿至哲  
廟博采師虞始新除於邦傑遄贊萬機之務蔚為千載  
之逢恭惟兵部尚書才備全能識覃衆妙蚤以淵源之  
蘊發為經濟之圖擢貳憲臺絕震師之殄行越長諫省

據告后之嘉猷譽益重於熙朝職遂專於武部曳星辰  
之履姑聯八座之班紀日月之常即懋三階之績某晚  
遊京轍屢叩門牆竦傳新渥之頒實倍常情之喜

賀韓刑書啟

晁子西

伏審簡隆宸扆序陟禁塗畫舜代之冠方期於刑措曳  
漢庭之履宜奉於制除有識相趨不謀同慶恭惟判部  
尚書神標凝峙仙韻邃清練達本朝之舊章洞明當世  
之先務學皆探賾本胸次以推行才足應機至目前而

迎解早膺親擢久列從班疇公望之最高屬憲曹之建  
長果陞華於八座併潤色於九章蓋自元豐之正名初  
復六職至大觀之定令始顯一司茲得全才肆兼重任  
某猥縻印綬阻叩門牆雖頌歎之彌勤顧編摩之尤拙

賀廖工書啟

何子固

伏審益注凝旒晉班曳履百工皆聖所作疇推創述之  
才八座非賢孰居宜被褒遷之渥師虞允穆朝序益清  
恭惟判部尚書有經世之學守之冲深有華國之文將

之敦厚告猷東掖納王命以回天執憲南臺簡帝心而  
易地肆佩龍淵之錫寢膺鳳沼之除將見技巧惟新自  
元成而鮮及規模更遠至周召而迺留由階以升可拱  
以俟某召承巖邑早趨倚於龍門通守海邦比拜違於  
烏府逖傳新命倍激孤衷頌歎彌勤編摩曷旣

西掖

中書  
中書舍人  
中書侍郎

賀王中書啟

寵隨龍馭榮陟鳳池當風雲感會之時復天地交泰之

象傳聞四海歡喜一辭竊以國步多艱方撥亂而反正  
仕途久壅當為官而擇人況中書政事之原乃天下根  
本之地有德在位斯民舉安恭惟中書相公學贊皇猷  
才全王佐直方大以求諸已安平泰以濟斯民洗光咸  
池親逢盛旦宣威沙漠定策元勳眷注益隆譽望彌著  
某傾心盛德翹首下風附驥尾以無階賀燕厦之有託  
仁者在高位已符孟子之言聖主得賢臣願奏王褒之  
頌

賀范中書啟

晁之道

顯膺中詔晉陟兩臺歡聲所加和氣自應恭惟某官博  
大高明直方敦裕必欲致主唐虞之上固將列名夔契  
之間秉節不回堅如金石盡言必効應若著龜乃自江  
湖復於廊廟惟一人睿意之攸注與四海公議之所歸  
共期更化之成惟恐登庸之晚果敷龍檢爰步鳳池方  
且畢慮盡忠同心協德政圖於實不必高明之拘法惟  
其時要以安民為本事還舊觀人蒙更生故於朝夕之

間以格天人之應興滯補弊宣王所以康兆民壞植散  
羣太公所以報明主仰聖哲之相遇揆詩書以同符上  
帝於焉博臨萬世以之永賴其猥以頑蹇厚蒙眷私方  
萬物同慶之時實一介有成之日矧摧顏暮境已竊哀  
憐而孤憤愚忠尚思黽勉雖阻趨於門仞已坐謁於情  
誠歡忭發中敷陳固旣

賀中書王侍郎啟

晁之道

伏審入覲天光薦承帝制亟從真館進陟西臺乃顧政

事之本原宜歸天下之名德既賀明良之會遂觀調一之功伏惟慶慰恭惟某官賢為時生畧不世出剛方邁往之氣足以聳動搢紳英偉博通之才足以酬酢事變富以孔孟道德之學緯以商周盤誥之文故論思獻納之規獨高乎從索而啟沃謀謨之績見紀於廟堂恥妍媸以幸容寧感激而遽去至言既久而彌效忠節欲蔽而愈光果錫寵靈還登輔弼恭惟聖主選衆起公之意與夫嘉生仰德望治之心必當加踐平昔之言期以盡



收太平之實惟因時而循理足壞植而散羣顧茲休功  
有待今日某被眷惟舊受恩最深自欣投老之期獲覩  
登庸之任

賀中書何侍郎啟

劉文潛

伏審聖朝選衆帝制褒賢密貳中臺實資右弼積勤廊  
廟已高綱轄之功深簡帝心遂付機密之本伏惟慶慰  
恭以某官端清忠亮博大疎明學術淵源陋兩漢而不  
數文章爾雅追三代以同風行高而能濟以寬才大而

不失乎正凜然風節一於險夷茲見古人之有常是謂  
大臣之以道自登公輔益著賢勞立名夔契之間致主  
唐虞之上果聞寵命增煥爾司總庶政之源益茂謀謨  
之績正具瞻之地更觀調一之功某猥以疎愚久塵委  
使方風馳於窮蹇獲遠聽於吉音莫殫賀厦之誠徒有  
蔭雲之幸

賀中書林侍郎啟

汪聖錫

顯被制書進叅機務輟詞臣於鰲禁訂國論於鳳池縉

紳聳聞中外交慶恭惟中書侍郎懿文華國直道致君  
以淵雲之學自名一家以晁董之才親承大問始終全  
節被遇累朝踐揚皆極於華塗圖任悉歸於黼宸繇北  
門之獻納總右省之幾微深惟不世之姿洞達當時之  
務靡勞施設足見猷為方將沐浴於太和何以揄揚於  
盛德永垂方冊屬我宗工某一走門牆六更符印忽驚  
流落獲在陶鎔倘蒙庇於裒殘尚少圖於奮厲其為忤  
悃倍萬常情

賀中書劉侍郎啟

邵澤民

伏審詢求元德協贊萬機撫熙洽之隆方當接千歲之  
統盛繼述之烈宜得不貳心之臣與叅政事之本源益  
廣聖賢之事業應為協氣格於萬方恭惟某官博大而  
宏通高明而惇裕學通六經之閭域文雕萬寶之英華  
自為庠序之遊已積公輔之望丹鳳芝草實為聖時而  
生美玉良金必名清廟之器逮逢真主亟服禁塗儀刑  
特簡於淵衷論議必當於帝意果協明良之會進居綱

轄之嚴一德弗渝百工惟叙遂付幾微之本益觀經濟之功方將壞植而散羣何止興滯而補弊是惟天意顧豈人謀某曩以狂愚自干罪戾賤嗜貴獻情實靡他綆短汲深言則甚陋豈不甘齋志而沒又懼傷知人之明大明燭天盲不見日青陽生物病獨違春顧知己之門牆曠問安於時序腸九回其未已夢中夕而猶驚敢言形迹之已疎尚冀精誠之有感倘蒙施恩不報之地為一引於已隆之淵神若巫咸端能再造身同徐甲真遂

復生張方窘於抱關慙莫諧於望履側聞孚號倍極懼  
悰自欣投老之年獲覩登庸之日詎知餘生之有託方  
欣萬物以同榮喜忭發中情誠並竭

賀中書王舍人啟

晁之道

伏審前試大筆峻貳蓬山繼服上恩遂司誥命蓋前無  
比可謂至榮吾道用光有知相慶恭惟某官涵養異稟  
發揮斯文探唐虞之淵源備高古淳和之氣攬班馬之  
光彩極瑰琦彬蔚之姿於以用之無不可者當始進不

偶盖天俾感憤憂思以激其能遽一鳴可驚故人皆咨  
嗟歎服而謂之稱諒從西掖進直北扉不越期年即登  
台輔某少嘗有志晚迄不逢猥以狂言亟承誤獎貧兼  
百疾老萃千憂學即廢而遂荒文寢衰而愈下惟觀騫  
翥足慰窮愁顧趨慶之無階獨激心而有感

賀中書傳舍人啟

祖擇之

伏審膺被宸寵典司帝謨凡在縉紳之間欣逢除目之  
下竊以文章治道之鼓吹誥令朝廷之羽儀因人發揮

為世風采若才子選集則勛華之典粹醇議臣奮登則  
商周之書灝噩照爛往冊驚傳後人迨茲以還藐未足  
紀惟嚴徐枚賈之於漢及常楊元白之於唐猶馳駿聲  
僅躡遺躅於穆盛旦曼企古初下敞西掖之居仰模紫  
垣之耀豈止演明賞罰之訓蓋以梯媒凝承之材自非  
宗工曷副宏選恭惟某官器兼文武學貫天人志雖毅  
正而所履融和外則敏強而其中易直久裨宸衷之闕  
雅結淵衷之知宜渙恩靈遂陞禁近某寓名天祿屏迹



東溟第增聆命之歡適阻造庭之賀

賀中書葉舍人啟

蔣穎叙

伏審司言西掖易地禁闌朝廷用賢則榮益明盛時之  
羽衛縉紳有德者進猶為治道之光華伏以某官行中  
表儀學通倫類言語妙於天下知畧輳於上前金玉乃  
心冰霜其操自致功名之會親逢睿聖之知入直螭坳  
簪筆以司言動進遷鳳閣緣文以贊賞刑蹈仁義之夷  
途輸忠嘉之微志宜在昭世蔚為良臣某初聆詔條方

切歡歎遽蒙函翰倍懷悚惶屬居守於窮邊顧弗先於尺牘其為瞻係未易究陳

賀中書洪舍人啟

熊子復

伏審簡自宸旒擢居禁掖以詞林之傑而入掌於除書以朝路之良而進陪於基命當今翰墨所載將與典謨並傳何幸斯文有光今日竊以元豐外制之職仍歸舍人紹聖宏詞之科以待文士然而居是職者未必擢於辭級登是科者或不陞於制垣邈前後以相望曠古今

而一遇恭惟中書舍人道大而體粹才高而氣渾空逸  
步之馬羣長橫飛之雁序手抉雲漢時旣埽於粃糠世  
掌絲綸文自成於珠玉惟茲九試果遂真除獨高西省  
之聯兼寓北門之直操淵雲之精筆妙墨者昔無儔匹  
秦楚之堅甲利兵庶今有助某猥居原隰逖望門牆但  
切欣於得興莫趨慶於成廈掌帝之制已潤飾於皇猷  
秉國之鈞即彌綸於庶務

賀中書蔣舍人啟

綦子復

伏審妙簡宸旒真除禁掖以辭人之伯而入掌於贊書  
以儒者之宗而進聯於端尹增光典冊竦動搢紳竊以  
中書政事之原播告必資於大手元良邦國之本弼諧  
允賴於正人匪卓冠於清班曷併膺於華渚恭惟中書  
舍人詹事規模宏遠蘊藉醇深文陞奏篇才已高於晁  
董史垣載筆法自過於荀袁久已攝於訓詞果遂正於  
圖任風雷鼓舞既專美於絲綸日星光輝更助成於羽  
翼某依仁甚久去德猶新遂聞成命之頒實倍常情之

喜掌帝之制方並寵於金鑾秉國之鈞即進陪於玉鉉

賀中書錢舍人啟

謝子山

伏審膺被寵光典司名命真賢彙進公論協同竊以王者攬萬里之微制四海之動曉致治之意必鼓之以文辭成有為之功必先之以訓勅唐虞為盛溫潤著於典謨商周甚隆詰曲形於盤誥故惟文章制度之美實賴修飾討論之才伏以某官德性茂明道心冲遠嘉言謹論極天人精祲之微殫見洽聞該國家表裏之要上心

素屬興望所符矧惟專對之勤宜正代言之選某首承  
謙眷特貺筆牋感頌之私編摩罔旣

賀中書范舍人啟

任子方

伏審被恩黼座進職綸閣賢哲彙升僉謀協慶竊以王  
者之鼓舞天下必資名世之微言儒士之優游禁林久  
號古文之精選洪惟前代具述彝章溫潤著於典謨唐  
虞獨盛詰曲形於盤誥商周繼隆闡揚道德之淵源烜  
赫古今之視聽自非偉俊孰副討論恭惟中書舍人德

履純明道心冲漠決科發策極天人精祲之微削草抗  
章該國家表裏之要上心素屬輿望所符矧已載筆於  
殿均宜亟贊書於星掖未遑修候先辱流音仰服謙冲  
彌增銘佩

賀中書呂舍人啟

伏審顯被制書寵升禁掖伏惟慶慰伏以某官本深末  
茂器博用周親逢邕隆奮起鴻學遊麗正圖書之館歷  
奉常禮樂之司露囊而論典刑簪筆以記言動耿耿惟

憂於國計旬旬益大於家聲既持一意之堅尤重重瞳  
之眷果由近職入直紫薇汲鄭論思實漢庭之羽翼常  
楊潤色為唐室之光華某叨聯從班每瞻眉宇慶此得  
賢之盛形於聞命之初賀牘未遑譙滕先辱懷感悼而  
欲布顧濡翰以何能

賀中書陳舍人啟

王履道

掖垣虛位久俟異才宸綍疎恩茂膺真拜由左史之高  
選升西掖之清班成命甫傳有識相賀伏惟慶慰恭以



某官高文瞻縟邃學淵源筆叅造化而宛繼前芳腹貯  
經綸而可當大任不勞追琢璠璣為希世之珍少假壅  
培杞梓成合抱之器誠家學之克肖偉世業之能承譽  
已滿於寰區眷尤隆於正宁顧蜀川秀美世不乏於淵  
雲矧漢詔丁寧才正資於賈馬將於已試何待旁求咸  
稱詞苑之得賢愈覺皇朝之增重某逖聞新渥喜溢卑  
悰屬坐守於郡符阻走趨於賓閣

賀中書陸舍人啟

汪彥章

顯膺宸命進直掖垣於簪筆代言初陪法從之列然瑣  
憲批詔妙極儒生之榮矧選授之才堪凡聽聞而心服  
恭以某官天資渾厚心術高明卓然公輔之才加以聖  
人之學文章爾雅追還三代之純議論正平多識累朝  
之舊早叅依於日月中流落於江湖時乏居易之忠精  
帝意仲舒之簡古問釐宣室結知無愧於昔人起草明  
光能事更看於他日某銜恩未報佩德猶新前瞻大廈  
之光方懷阻濶忽返故棲之地皆出生成氣候清和論

思休暇願保節調之適仰承眷注之深

賀中書周舍人啟

趙承之

光奉上恩榮司外制望隆朝野歡動搢紳伏惟慶慰恭  
以某官擇乎中庸好是正直文彬彬而濟實志蹇蹇以  
匪躬知無不為蓋官守言責之故義之所在實忠臣孝  
子之心揚於王庭想見風采曾賜環之未幾以詔書之  
屢遷矧詞掖之秘藏豫政機之密勿豈特商盤周誥專  
渾灝之文章抑亦堯咨舜俞備清簡之顧問得公為重

允帝之求某獲綴班聯猥承眷好蒙貺書之甚寵愧占  
謝之不勤陞遠堂高願篤協恭之義松茂柏悅敢私不  
寐之誠情形於言書不盡意

賀中書梁舍人啟

右某啟伏自拜恩已嘗伸賀恭惟舍人壺冰峻彩巖電  
英標稟秀氣於岷峨振雄名於京洛學惟覩奧入聖域  
而已優辯可摧堅占議園而無敵品格素高於月旦詞  
華早挾於天庭爰自先朝便升清貫內佐計相外剖使

符體寬大以布詔條用文雅以飭吏事坐堂聽訟克播  
於歡謠視草求才果膺於急召爰九重而肆覲見萬乘  
以垂知宣室前登問鬼神於前席禁林試可給筆札於  
尚方一時之紙價頓高豎日之絲言薦降南宮臥錦既  
改七兵之曹西掖判花便裁五色之詔將啟迪於帝載  
實焜耀於儒林平奏議於省中佇神明於唐制頒號令  
於天下同誕布於堯言三代之風不日而復某聲塵無  
取名輩相遼偶諧附驥之誠亦在續貂之末幸依先覺

必免至於面牆怯見大巫已自甘於閣筆然得親於蘭  
室須強厲於鉛刀顧函丈之有期忽尺題而為貺仰荷  
勞謙之旨愈增反側之懷內省庸虛何以克勝



五百家播芳大全文粹卷十

欽定四庫全書

集部

五百家播芳大全文粹卷十二

詳校官編修<sub>臣</sub>謝振定

助教<sub>臣</sub>常循覆勘

總校官編修<sub>臣</sub>王燕緒

校對官中書<sub>臣</sub>葉蘭

膳錄監生<sub>臣</sub>李師弼



欽定四庫全書

五百家播芳大全文粹卷十一

宋 魏齊賢

葉 棻同輯

賀啟

翰苑

賀錢內翰啟

罷直內閣升華禁林解天府之浩繁付經帷之清燕雖

衆望所屬理固當然而成命既行士以相賀伏以學士  
號為職親而地要實儒者之至榮訓詞欲其言近而旨  
深必文人為充選設官雖專於書詔儲材當用於鈞衡  
被選益艱因人增重雖從容入侍獨高太白樂天之詞  
華而議論經邦復重德裕敬輿之術業苟擅一長於此  
皆為稱職之才洪惟本朝繼有碩望方當聖主之圖任  
果見異人之來儀伏惟某官學總百家才高一世經守  
韋平之學世登晁董之科無施不長所治皆最批郤導

竅在庖丁如無牛越國過都於騏驥為歷塊隱然公輔之望久矣中外所期俄聞異恩大慰衆論謀謨黼座何慙天子私人顧瞻玉堂應嘆吾家舊物即膺大拜用究遠圖某每愧庸虛素承知獎其為欣快實倍等倫嘆白髮之侵凌望青雲如寥廓歲事已晏德履多祥

賀劉內翰啓

張安國

入覲龍墀延登鼇禁典司翰墨極儒者之榮銓總官曹高從臣之選矧席薦颺之舊實深慶蹈之懷恭惟某官

行立表儀智周事變材為時用備文武之憲邦學本家  
傳根中庸之至德自結兩朝之眷早登四輔之聯思若  
湧泉真鳳閣舍人之樣心如止水為虎符刺使之師歌  
袴襦於姑蔑之墟洗甲兵於雲陽之野功既成於授鉞  
命爰錫於賜環不遠千里而見王果以一言而悟主精  
神夙契眷注益深北門正內相之除南郡領天官之長  
玉堂揮翰日觀雲漢之昭回金殿掣鈴時近天威之咫尺  
為命雖資於潤色矢謨實賴於弼諧豈止發為文章

號禁中之頗牧要當諫本仁義措天下於唐虞佇聞絲綽之頒即正鈞衡之拜某濫司戎閫辱在恩閱念步武之相隨荷齒牙之曲借欣傳除目喜倍常情黃麻之似六經復觀制作洪鈞之轉一氣更累生成商律方嚴禁塗多暇幾精調於和粹式茂對於寵臨

賀洪內翰啓

熊子復

伏審簡自上心擢居內相以詞人之伯而代播告之言以儒者之宗而奉燕閒之問當令典策所載燦與典謨

並傳何幸斯文有光今日竊以翰苑題名自建隆以下  
疇世掌於龍綸辭科選士由紹聖以來幾身躋於鼇禁  
矧兼二美榮絕一時邈前後而罕聞曠古今而僅有恭  
惟內翰尚書氣嚴而中裕體邃而外沖障百川迴狂瀾  
早傳正學洗萬古空凡馬獨負奇才自首綴於殊科即  
薦揚於華貫記言丹陛得孔氏之謹嚴書命紫垣同漢  
家之深厚越執選曹之柄兼陪宥府之籌蔚有令名播  
在公議果親除於玉宸亟進陟於金鑾局雲霧之憲既

號私人於內禁曳星辰之履乃班常伯於中臺克承新  
渥之隆益紹先猷之美某猥行原隰逖叩門牆但竊欣  
於得輿阻趨慶於成厦掌帝之制黃麻已誦於搢紳秉  
國之均赤舄更躋於廟廊

賀洪內翰啟

陳君舉

伏審召自輔藩還居內苑晁疏圖舊蓋謀謨啟沃之特  
親典冊增光信號令文章之可述有識相慶不謀同辭  
竊以陸敬輿制書感人果見興元之戡難李文饒詔語

切事迄聞魏博之代謀苟訓辭洞曉於羣情則禍亂潛  
消於當世時適丁于多故上渴想於真才謂將致乾坤  
之清夷實有藉雷風之鼓舞操淵雲之精筆妙墨非公  
莫能答秦楚之堅甲利兵自獲多助恭惟內翰妙宗  
道壺雄帥文壇胸次容萬頃之波毫端扛百斛之鼎早  
膺簡注入踐禁嚴文部最高更曳星辰之履京城非遠  
暫持江海之麾方撼鈴而應戎索之興宜抵草而思詞  
林之舊益手抉雲漢曾飾昭回之章矧世掌絲綸素擅



垣明之制清光復侍密命親承將見德音播而溫於美  
幣良繒丈告行而威於勁弩長戟某猥縻原隰阻拜門  
牆貯丈士於內庭要蓄濟時之器列才臣於上袞即攄  
經世之圖

賀陳內翰啟

黃秀岑

驛騎再馳星漢墮靈槎之使鼉扉趣召翰林連華蓋之  
居經從翻藥之階入聽穿花之漏其為榮遇未易名言  
竊惟賢能所以致中興文章所以垂不朽自昔膺籙受

圖而與民更始必有持簡筆者為時而生負起卓之奇  
材摠皇王之餘議胸吞雲夢皮挾風霜吉甫美周相如  
諭蜀梁津赦令澤潞舊書所謂雄深雅健之文無負獻  
納論思之選前朝習治近偉啟戎四海瘡痍六經煨燼  
洛書授禹神扶定鼎之傾天策開泰地峙登瀛之峻端  
拜而議其誰宜為伏惟某官發藻士鄉飛英朝著文章  
俊語長照映於人寰忠言嘉謨寢翱翔於法從貳卿粉  
省批勅銀臺茲起燕閒復還嚴近扈六飛而視草供十

吏之濡毫久勤西域之贊書爰正北門之遞直益於武  
夫悍卒咸知哀痛之誠庶幾舊國故都遂有掃除之便  
式煩鴻筆協濟壯猷某自愧雕虫虛蒙薦鶚動貢公之  
竊喜忘庾信之清愁尚冀鱗攀寧忘螽躍

賀秦內翰啟

鄭元老

顯膺綸命進陟鑾坡大哉王言將鼓天下之動儼然  
人望乃極儒臣之榮吾道用光本朝之重恭惟內翰  
才不世出學由性成晁董奏書獨處漢庭之第一丘軻

正統克承堯運之半千早逢雨露之承薦歷雲霄之路  
紬冊府圖書之秘訂曲臺容典之宜眷言語侍從之惟  
良寶號令文章之有作待北門之詔既屢直於禁林進  
甘泉之班果正名于內相精神聚於黃屋勲業成於黑  
頭恩隨宮錦之華禮借金蓮之重鄭人為命聊資討論  
潤色之工舜官颺言式著賡作載歌之美矧惟大任降  
自清門太師轉洪鈞以底聖功明公提大筆以贊文治  
形容王度神化麗乎丹青焜耀家聲貴名升乎日月方

將襲隆盛於韋平之緒追風流於王謝之家由階而升  
可拱以竢某凋零歲晚瞻望日勤自縻符竹之間久去  
門牆之下願新耳目飽看三盤之書常使子孫遠觀八  
葉之懿

賀何內翰啟

趙德莊

恭被德音入都內相導承禁密仰機政之與存左右宴  
私喜正人之愈近具頌異數增重斯文惟大德可以格  
君心之非惟有言可以鼓天下之動粵自古兼收於能

事蓋衆賢各致其所長若乃劇上盡規補日月於無過  
由中作命渙雷風於有孚非屬異才未聞專美恭惟某  
官正容悟物盛飾入朝追配先猷猶觀要妙長雄多士  
徙出緒餘自感會於主知以責難為已任諫藁雖聞於  
旋削聖功自覩於又新方將丕冒華夷諭之德意責成  
將相飾以訓詞遠追三代之風茂輯一王之典更資鴻  
筆用暢玉音某久列下交欣聞盛事宮商相應識元氣  
於黃鍾台輔所纏想榮光於華旦

賀鄭內翰啟

崔子淵

伏審恩霈中宸榮遷內相除音四達輿議交歡恭惟某  
官性稟明誠學該微妙師心無惑燭理旁通道深貫於  
聖真經自成於家說亨衢特立峻節自持惟名實之並  
隆宜寵靈之渥至代言西掖視草北門形容治世之成  
功潤色太平之鴻業魚金兼佩特峻官儀蓮燭分光優  
承睿渥將踐機衡之任暫收翰墨之勲對越盛時佇看  
丕績某濫持使節方隔賓簪徒均賀厦之誠第切依風

之想

賀鄧內翰啓

李去病

伏審顯被恩書擢居內職伏惟慶慰竊以處翰墨之司  
皇朝之妙選掌絲綸之命儒者之至榮日奉清光進承  
睿旨實預樞機之重密叅經緯之權必有鴻才斯膺簡  
注恭惟某官奇才英麗瞻志該通胸中之書卷五千孰  
先岐叔架上之牙籤三萬莫富鄴侯盡窺乎流畧之源  
深覩其天人之奧果奮六駟之具爭先萬里之途入蓬



夔龍親承日月高  
參豕繫卓然道德之文妙擬典謨煥  
若帝王之制是宜  
恩章輝赫體貌隆崇  
驅天廐之龍駒  
先生里閭橫尚方之寶帶  
寵耀班行弟兄聯華萼之榮  
君臣洽魚藻之樂一朝具美  
百代揚芳  
某賦分伶俚稟  
生固陋臨江河而莫濟  
敢冀津梁望門屏以無階  
徒思  
羽翼下情欣蹈實倍常倫

瑣闥 門下侍郎 給事中

賀門下孫侍郎啟

秦少游

光奉明恩進陞東序伏惟慶慰恭以某官星躔異稟岳  
鎮殊鍾先朝藩邸之舊臣今日廟堂之耆老正直稟羔  
羊之德信厚有麟趾之風解劇樞庭乃心不急均勞輔  
鄙報政方成民心竚以旋歸國論倚之進斷粵從林館  
入踐鸞臺薄夫撫已以自慙吉士舉酒而相慶矧同升  
之俊又皆妙選於縉紳三王之法本人情固無過舉六  
官之長皆民譽茲謂昌期某辱在陶鈞

云云

賀門下趙侍郎啟

石敏若

輔世長民庶事康而股肱喜疏恩渙爵有德進而朝廷  
尊風采聳聞室家相慶恭惟某官萬夫之望百世之師  
撓不濁而澄不清測益深而窮益遠姚崇應變衆莫能  
窺楊綰服人下觀而化功多有厚賞才大無卑棲簡在  
帝心對揚休命以儒術而飭吏事天子是毗騰茂實而  
飛英聲國人曰可匪朝伊夕論道經邦某直寄錘鑪之  
間遐想雲梯之上羣工並用永孚于休大厦既成云何  
不喜

賀門下韓侍郎啟

石守道

伏審顯膺申詔進陟東臺名實並隆士民交慶恭以某  
官稟天間氣為國宗工性源淳厚而澄之愈清器量洋  
汪而撓之不濁貫古問學該今典常道不虛明遇千載  
明良之會人惟求舊助萬幾兢業之勤式是四方之瞻  
允為百辟之憲陞居黃闥對揚赤墀秩已亞於貂蟬班  
益崇於鴛鷺即正機衡之任優登鼎鼐之司某漕計外  
縻賓階前阻心同賀燕方觀大廈之成志効躍金正倚

洪爐之造載惟歡忭實倍等夷

賀門下范侍郎啓

孫夢得

伏審光膺渙命載載揔東臺公論所歸帝舉時當恭以門  
下侍郎才全而德備識遠而慮周學洞天人之微智通  
事物之奧練達治體翱翔要途顯顯三朝之老成堂堂  
一代之宗伯兩年去國坐勤宣室之思一日還朝益重  
台階之望况將紹述神考秦陵之聖治則必選用熙寧  
元豐之大臣孚號既頒輿情式喜即期旦暮誕布絲綸

乃賡載歌行繼舜廷之治爰立作相佇膺商夢之求某  
坎壈孤踪馳驅末路下喬木而入幽谷誰為子賤之賞  
音縱大壑而遇順風竊慶真言之得位載惟孱陋夙荷  
知憐謾為甘泉侍從之官徒起周南留滯之嘆喜聞成  
命寶倍稠人雲霧如披尚阻青天之覩燕雀相賀先欣  
大厦之成下情無任歡忭之至

賀門下孫侍郎啟

李方叔

伏審顯膺宸寵叅秉政鈞時庸一德之臣寶慰輿人之

誦伏惟某官三朝服采六藝名家謀猷通當世之宜出  
處協先民之義父菑子獲致吾道以尊君兄友弟恭率  
至誠而贊化早隆耆望方陟近司士心已至於交歡上  
意猶嗟乎見晚佇登元弼永翼丕圖四時臻玉燭之和  
七政入璿璣之運某首承謙翰良積感悰玩繹之勤編  
摩罔喻

賀門下周侍郎啟

張正己

伏審禮隆北極誕錫殊恩位重東臺載膺大任益顯知

人之哲共欣進德之尊恭惟門下侍郎王佐上才天民  
先覺險夷一節出處三朝所至有聲無施不可光華二  
轄早被上知清切兩臺備陪國論太平而宅富貴早遜  
碩膚壽考而保功名懇辭重祿民方俟后天豈遺賢召  
起江湖膺一人之眷倚對揚軒陛聳百辟之觀瞻暫育  
德於琳宮屢告猷於黼座明邦國之若否辨人才之正  
邪惟帝念功賚岩廊之丹詔貳公弘化拂瑣闥之青璫  
言合稷契之忠民被堯舜之澤成襄周召佇陞師保之



崇明禮躬榮終享老更之福嘗謂大臣報國莫急薦賢  
烈士殺身不忘知己祐甫賢相補吏無八百之嫌仲尼  
旅人養徒有三千之盛況台衮之當國豈搢紳之乏人  
某尚書早獲於見收致賀莫言其先務倘不遺於葑菲  
願有託於阿衡迹邈黃扉心馳榮座瞻依所極嘆咏未  
周

賀門下許侍郎啓

程養正

伏審顯膺綸綍進貳機衡夷夏交欣朝野響動竊以東

臺地峻左省班清造膝嘉謀預聞乎大政沃心盛業密  
贊於宏圖是為喉舌之司允謂股肱之任選用之重古  
今所同恭惟門下侍郎道應直方器周遠大出偶重熙  
之運卓為名世之賢出入三朝終始一節屬聖心之圖  
舊由江滙以召歸盤旋蹈難進之風靜退保謙終之吉  
千帆競過尚艤濟川之舟三年飛鳴曷測垂天之翼恪  
司真館均佚私庭雖久蔚於師宮實陰儲於帝眷碩膚  
能遜周公之赤舄方安舊物何求王氏之青氍復得郎

音騰示興議交歸諒於轉漏之間已有折衝之勢昔魯  
邦紆難由季子之來歸唐室中興自晉公之再入得人  
之要其利不貲洪惟本朝臻此盛事方將坐而論道力  
陳紹述之謨庶幾作成先王復見熙豐之治某尸官有  
守望履無階賀厦之禽睠華軒而斂翼戀軒之馬篋歸  
路以長鳴

賀門下吳侍郎啓

晁无咎

誕膺顯檢再表政機已光選衆之求更竦具瞻之望凡

居庥蔭靡不欣愉恭惟某官致主忠誠濟時賢業寵冠  
三朝之舊譽高百辟之前著龜治亂之所昭柱石安危  
之攸恃久茲均佚未替告猷聿逢圖任之明復貳納言  
之重國政弛張之素達人材能否之盡知祇賴和衷以  
成累洽伏念某稟性朴野賦命奇窮早薦歷於蘭臺晚  
屢更於麾守嘗遭尤悔旋被洗滌皆朝廷及物之私與  
門牆好德之士尚叨寄委敢怠承宣今川流已復而無  
虞歲事將登而甚美吏知免咎民識樂生仰大厦之幬

蒙固無不芘撫孤踪之蹉跎當有所歸變理宴閒神明  
勞相屬居官守阻造台閣

賀梁給事啓

蔡君謨

輟直西垣通籍北省專銀臺封駁之任進瑣闥追趨之  
班邦家之光海寓胥慶伏惟某官學窮奧蹟名冠倫魁  
元龜天地之機九鼎社稷之鎮被短褐而懷玉擅價翰  
墨之場結長綬而腰金策足功名之路湊風雲之佳會  
躡雲漢之清蹕騫騰夕拜之遷傾倒辰猷之告封詞頭

而不下舊傳解事舍人之名批勅尾以復歸共觀儒者  
給事之效惟出令毋嫌於反汗則論事咸嘆於回天仁  
人之利溥哉君子之道長矣可速則速寧論諸公衮衮  
之升當言必言要為一士諤諤之益日三接而甚寵歲  
九遷而可量起海瀕而擢賢良已兆封侯之業遊都城  
而取卿相方歆稽古之榮某刺首吏韁託身德寓悵阻  
光儀之久欣聞寵渥之新鵬兩翼之垂天孰測南溟之  
運鳳九苞而瑞世但快朝陽之鳴歲律崢嶸禁途密勿

願精鼎食亟副岩瞻

賀金給事啟

趙德莊

命出昕朝寵陞夕拜處正臣於禁密仰公道之開明恭  
惟某官德盛照鄰學高經世早登軒陛兩極忠良之誠  
退託江湖一無懼悶之色偉修明之業立締晚遇以彌  
深乃眷容臺適更鉅典配禮文之變以義起而不疑致  
孝饗之嚴自親推而益著煥然制作屬我老成惟時青  
瑣之選實待黃門之用轉圜有道坐知天意之回反汗



無嫌更覺王言之大某曩由省戶獲望履約想鸞注之  
高翔自憐倦翼附龍門而不朽敢有遐心

賀吳給事啟

熊子復

伏審光膺妙簡擢踐要塗職封駁於瑣闥望隆臺省贊  
謀猷於督府威震邊陲宸眷甚優輿情胥悅竊以皇武  
之命丞相孰佐遠圖廷臣之擇賢能寧間大吏用輟夕  
郎之貴往陪天宰之臨庶廟算之不遺致人兵之自屈  
恭惟叅贊給事才閎而應博識敏而造微擢自上皇風



貳憲臺之峻簡由嗣聖旋升計省之華即近甸以偃藩  
併中都而蒙潤騰休聲於三輔藹佳氣於千岩茲復要  
途方期妙畧屬咨冢席并護戎旃維時傑出之才委叅  
妙畫越處塗歸之仕特示殊遷少需邊瑣之寧還預政  
機之重某逖將漕計竦聽除音猥縻傳乘之勞莫覩屬  
韃之盛

賀張給事啟

晁之道

伏審薦被宸恩寵升夕拜惟此紀綱之地實為廊廟之

資除目流傳搢紳聳嘆恭惟某官學深邃與識動機先  
以高明間世之才膺神聖非常之眷大明國是深契上  
心未逾期月之間獨擅論思之效論議之定朝廷愈尊  
方觀調一之功即正謀謨之任某早諧瞻際厚辱眷憐  
曲矜篤塞之下才載篤葭莩之末契逮聞新渥知名德  
之愈光探省孤踪覺忤懷之有託

館閣 修撰 秘閣 校理

賀集賢楊修撰啟

趙德莊

竊以待詔承明之庭漢得人而為盛脩書麗正之殿唐  
置使以甚雄故子雲以詞賦擅名燕文以史筆自任迄  
今官司未改祿秩彌優公宴舉觴禮均四輔禁門通籍  
地接千廬自非學洞鱣緇識叅繫象博物幾乎子產屬  
文似於相如即何以記三篋之書諸儒嘆伏獻四巡之  
頌當宁嘉稱允屬宗工式光俊選某官治行尤異秉心  
塞淵體大雅以成文蹈中庸之為德朱絃疏越宛有正  
聲玉水方流自懷至寶由計偕而旅進乃藉甚以馳稱

紫庭亟覩於決科黃綬旋聞於隨牒刺奸南部載宣懸  
捧之威求瘼番禺益勵酌泉之操適討論於邦典仍幹  
掌於闕征聚貨殖於五都米鹽斯劇考質文於三代綿  
絕居多俄慷慨以上書果深嚴而召試平津第一諒博  
極於天人江夏無雙且恣觀於圖史顧亨途之伊始寶  
輿議之攸歸矧瀛洲列仙之殊庭羣玉上帝之冊府昔  
者金泥石檢嘗草東封之儀縹帙芸籤重定開元之目  
今天孫候翠華之幸屋壁藏科斗之書必將講故事於

乾坤聿修典禮訪遺編於汲冢大備闕文罄竭誠明彌  
縫職業苟非鴻碩曷副疇咨某忝預宗盟並荷堂構二  
惠敢期於競爽萬石徒喜於不衰側聽寵榮幾至忤舞  
幸同蘭蕙誠臭味之靡殊願比葛藟庶本根之攸庇豈  
期撝抑先賜華賤亟惠顧之所臨但佩服而無斁

賀刁秘閣啟

楊大年

羣玉之府圖籍攸歸承明之廬俊賢所聚自非兼該文  
史洞達天人擅博物之稱負多聞之益則何以掌蘭臺

之秘記辨魯壁之古文克分亥亥之非榮對鬼神之間  
允資鴻博式副選掄恭惟某官竹箭貞資天球秘寶薦  
紳推慕負宸嘉稱羣公奉金以交驩諸生攝齊而請益  
紫宸引籍紅旆行春循吏之謠益喧於十部望郎之選  
游歷於三台公望愈隆天眷彌厚屬簡求於髦碩用刊  
正於縑緗輟明庭伏奏之勤副筵閣紉書之選矧乃育  
材之地適鍾下武之期禮遇甚優不致子雲之寂寞品  
流以別且無方朔之詆諧某猥符竹之所拘揖風期而

尚阻願言慶忭倍異等倫

賀劉校理啟

冊府藏書是居清禁公車待詔必擇名流某官擢秀丘園策名場屋自牽絲而筮仕頗棲棘以興嗟屬天官會課之初乃仙館掄材之際聿從明識克副精求既彰汗簡之勤果拜絲綸之寵佐九卿於棘寺聊示陟明校四部於蓬山更資稽古方隆乃眷豈測怒飛

蘭臺

秘監

校書

正字

著作

賀陳秘監啟

熊子復

伏審渙領龍檢晉摠麟臺帝眷愈隆亞六卿之妙簡官  
儀益重摠三館之清流典籍增輝搢紳交艷竊以冊府  
常虛於建章宸廷益重於賢哲淳化裁儀中秘常煩於  
舊弼元豐更制大蓬特畀於從臣蓋近而鼇坡由是階  
而升上而鳳沼自此塗而出天將大任道可前知恭惟  
大秘監庶子舍人德性融明道心淵靜學能幾聖抑將  
在軻雄之間道可致君益親見唐虞之際自復遊於帝



所即愈贊於皇猷司籍而別九流既獨專於書省揮毫而奔萬象更兼典於詞垣皆極儒臣之榮蔚為當世之望果進班於長席愈妙簡於前旒某久聞英符聳聆新渥徒激危衷之喜尚嗟孤跡之留幸及瓜期倘可離於劇邑纔更冀朔即遂拜於崇墉

賀王秘監啟

陳履常

伏審路門布命秘館搜材百年禮樂之文幾於麟泣一日邦家之彥見此鳳儀乾坤清明草木華煥恭惟某官

器包渾厚學極高明會兩端以用中應萬殊而曲當南  
宮俊彥虎傳翼以快飛東觀舊游風引船而小却嘗自  
遂江湖之放曾不聞容貌之枯非有道然孰能此者會  
聖明之摠攬睨英傑之彙征集蓬萊海上之山去煙火  
人間之食孰云此遷不在高賢某謬辱深知欣傳告語  
撰皇覽而誇未學豈敢望公矢帝謨以輔明時不宜後  
彼

賀莫秘監啟

宋子京

伏審疏渥宸廷持綱冊府挺然直諒夙登至治之朝卓  
爾高華還正久虛之位有識交頌不謀同辭恭惟大秘  
監學妙際天文高振古嘉猷則告切安危成敗之機直  
道而行全出處進退之節果疇鳳宸歸摠麟臺萃帝籍  
於西崑暫顯中秘環天樞於北極即運前籌某久聞光  
符逖傳新命第贊門闌之喜莫陪賓客之趨

賀范秘監啟

汪彥章

光奉詔除進登冊府得賢之慶有識所同竊以本朝之

興尤高延閣之選學者獲殫於所見異人皆出於此途  
自擾攘於一時忽更閱於再閏簡編掃地鉛槧無人逮  
修久廢之官首得非常之士恭惟某官身兼數器少有  
軼材當思皇多士之時擅博極羣書之譽考聖人之學  
蓋將援古以証今條當世之宜無不會文而切理奉篇  
上達褒紿中頒擢處羣英之先俾求中秘之逸某未遑  
馳問首辱騰牋悚荷兼深數陳曷既

賀錢校書啟

秦少游

被渥帝宸升華儒館伏惟慶慰恭以某官天資英發地  
胄高嚴翩然鵠正於碧梧卓爾珠遺於滄海申之以聞  
見之洽重之以探討之精咸五登三出佐休明之運駢  
四儷六尤多絕妙之詞敏疾擅枚舉之風雅健得子長  
之體倚馬可待下筆不休所以特受眷於先朝屢見稱  
於元老矧冊府校讐之號洎刑曹勾稽之司惟實與名  
既清且要熊掌兼魚飡之美自古為難羔裘加豹飾之  
華於今益寡緬彼文學之貴見乎諸子之中雖出異恩

實由公議芸臺畫省諒難歲月之淹鰲禁掖垣行復風  
雲之會

云云

賀曾校書啟

何文縝

伏承被召中宸讐書東觀物情胥愜賢德有光某官自  
奮盛隆之時早膺文學之選下帷黌舍六藝以造其淵  
源揚笏路朝諸公皆矚於光價暫丞劇寺還步殊途登  
天祿之崢嶸游道山之清切玉杯繁露之異悉考舊聞  
金馬碧鷄之雄盡探奇迹豈惟閱簋軸之秘良以養梁

榦之才思檢初傳儒林真忤某猶未遑於賀牘迺先辱  
於謙滕其在感藏曷勝數叙

賀王校書啟

張天覺

伏審光膺湛恩寵陞秘館朝言胥允賢德有光某官造  
道淵微裊身肅括早負出塵之想遂膺赴隴之書沛易  
傳家雅由諄誨阮麾出守休有治聲適登稽古之朝修  
復校文之職掩石渠於漢世追麗正於唐家果於此時  
首預茲選辨魯魚於終古悉正是非奮羽翺於層霄匪

伊朝夕某過沐勤隆之眷特貽彬蔚之詞載咏謙撫良  
深愧感

賀正字啟

竊審被命中宸僉書東觀實儒林之妙選為國士之亨  
通聞命之初撫懷而抃某官行能寬裕資稟粹和學深  
造於本原言兼該於體要聞魯淹之微意迨汲冢之墜  
編旁薄備於胸中是非見於筆下乃遇邳隆之會仰承  
聖眷之知重席傳經縫掖之徒交譽曲臺議禮奉常之



地不虛遂躋芸閣之華益覽石渠之富豈圖厚意先辱  
謙勝其在感銘罔勝敷叙

賀正字啟

曾子固

奉被詔函進登冊府伏惟慶慰竊以某官材資秀峙識  
度淹沖富華國之懿文抱撝經之宿學一人嗟異欲相  
如之同時多士推先服桓榮之稽古果允時望特被朝  
恩流馬木牛方佐中都之費金匱石室遂窺廣內之書  
竊惟寵數之行茲寶要塗之漸佇躋法從用協僉言某

獲在下風側聞成命分符海徼幸依德庇之餘寓直書  
林更託雋游之末其為欣慶曷可縷陳

賀方正字啟

賜對中宸升華內閣上恩優異賢業光亨國家憲奎壁  
以右文敞蓬瀛而籲俊匪獨圖書之寄寶為公輔之儲  
任惟繫於才能官不拘於階陞凡膺妙選允謂清流伏  
以某官早擅英聲素推興學金門射策風采動於諸公  
玉殿昌言論議開乎明主墨未乾於黃甲身已出於青

雲豈稽古之無功宜致君之有術側聞新命遠慰私誠  
未脩贊喜之儀遽枉相先之問謙勤滋至佩荷奚勝

賀王著作作啟

楊大年

漢詔賢良用致得人之盛唐懸制策最為取士之難允  
屬昌期申明舊典果聞間傑來副虛求某官學海汪洋  
辭鋒穎脫步武久淹於戎閫聲華早冠於士林屬當宁  
之搜揚遂所知而論薦木雞養勇終取擅場金烏揮毫  
不聞加點萬乘彌加于賞歎詰朝爰荷於甄升自蓮幕

之賓從佐麟臺之著撰賢俊斯得方詠嘉魚之詩著發  
不同豈測怒鵬之勢

五百家播芳大全文粹卷十一

欽定四庫全書

五百家播芳大全文粹卷十二

宋 魏齊賢

葉 榮同輯

賀啟

經帷侍講

賀喬侍講啟

宋子京

伏審光被寵榮就膺掄選勸講親賢之第校讐兩正之

廷側聽休聲彌增忤悃某官琳瑯峙秀奎壁含輝餘緒  
發於文章純粹光乎事業挺然出處之操不以先後為  
懷七領使軺兩更銓部籍甚羣英之上超然百慮之中  
宜奉都俞進居秘奧談經王府揮玉麈以雍容貼職道  
山運牙籤而宣樂某方茲詠歎遽辱緘滕其在感藏罔  
殫研味

賀劉侍講啟

張正己

伏審光奉渥恩擢陞要職璽言乃道山之秘奧居然王府

之宗師益躋顯榮諒劇慶慰某官性資純茂學問淵通  
早登賢俊之科久負經綸之志屢更重任尚仰長材方  
專講道之功復即校文之樂德音未老開經有拔擢之  
恭師古逢時擬議得該詳之體某側聞嘉命良極欣悰  
辱華翰之見貽積感懷之采劇

賀朱侍講啟

熊子復

伏審內典真祠入陪經幄日多閒暇奉清淨而游神之  
庭時有發明超倫類而入聖之域宸宸虛心而延佇儒

紳動色以交趨竊以真主今見猶龍蓋聖者又多能也  
碩儒在治若鳳必學焉然後臣之是故程夫子登於元  
祐之間尹先生進於紹興之際初下賜環而超召皆開  
講殿之詳延惟正心誠意者君所必先故尊德樂道者  
昔有如是天將大任道不虛行恭惟侍講宮使寶文性  
蘊高明氣涵光大探先天之妙理蘊開濟之宏圖親得  
其傳非予覺而誰也若是所習豈爾能免我哉方且倡  
諸儒於六經行當舉明主於三代某猥聯鄉墨幸色笑



之常親徒慕門牆歎步趨之難跂敢私贊小夫之牘益  
深述輿人之情聲雖成文言莫盡意

大坡 大諫

賀陳大諫啟

唐子西

光奉制綸擢居諫苑朝廷尊重中外聳聞竊以致君澤  
民聖賢之所易逢時遇主古今之所難當諫行言聽之  
朝居面折廷諍之任得伸其志實繫乎天恭惟某官蘊  
藉深醇議論辨博養慷慨敢言之氣抱縱橫適用之材

必將論列是非數陳利害然恐供職未幾別有九遷之  
榮遇事輒言安俟七年之久某荷知有素稱慶無由欣  
抃之私數陳莫既

賀楊大諫啟

程子山

簡自中宸擢居正諫君善養老天下之父歸之臣能格  
非大人之事備矣朝廷嚴憚夷夏聳聞竊惟今日國家  
之憂莫甚異時疆場之患茲固常情之所畏未若直言  
之不聞益無拂士者雖有國以常亡而有爭臣者雖無

道而不失倘造辟之辭竭於下則安邊之策在其中非公之賢其誰與此某官名高虎榜望峻龍門善刀而藏不輕一割韞匱而待卒酬千金啟沃丹衷斷二十年不決之議建立國本垂億萬世無疆之休父子之間而難言責育之勇不是過以茲補袞諒無括囊君子之道焉可誣國人曰賢然後用主聖臣直已契風雲之期言聽計從佇觀膏澤之下某出麾遐徼適際追鋒投刺侯亭遽蒙傾蓋欣聞成命益仰高風安太子之功固無慙於四

皓上揚雄之疏尚奚俟於三年

賀王大諫啟

林豈塵

光膺宸綽進陟諫垣聖天子樂在於得賢士大夫喜聞而增氣郵音遠播公論交騰恭惟某官德博而聲宏道方而事實傳周孔孟軻之學蓋已探其精微負晁董公孫之材將大見其施設惟丹宸廣忠嘉之路而清朝杜非枉之門謂其出羣公之先擢之置七人之上柳公權因筆以諫發於其心仲山甫補衮之功應之以手進有

益於上譽眷深締於皇情富貴本乎自期功業為之益  
著某側聞成命欣倍常情大厦初成燕雀紛紛而來賀  
東風自巧桃李脉脉以何言

賀馬大諫啟

邵澤民

伏審光膺宸綽榮領諫垣簡拔惟賢論議僉慶恭惟某  
官惠和育德端亮處躬學窮性命之原言合質文之要  
踐公朝之撫仕逢聖主之昌辰風聞益隆寵靈交至亟  
聞白簡非法不言頻伏青蒲以莊見憚允矣直方之德

卓然忠蹇之風道之方隆志必行於廊廟時乎有待功  
遂紀於藝常某漕計攸拘賓墀正阻徒均歡於厦燕方  
託庇於卿雲

賀陳大諫啟

楊元老

伏審光膺制檢首陟諫垣有爭臣者七人方資表率舉  
明主於三代益賴箴規冕旒處心簪紱增氣竊以重華  
協帝必兼求稷契之忠衆美效君孰不推王魏之直方  
聖治內修而總攬宜忠言入告以彌縫孰長熙朝供奉

之班必得昭代豪傑之士恭惟大諫氣嚴而中裕體粹而外冲奧學根聖人之經周才濟當世之務盡言無隱正色不阿果踐禁聯愈隆宸簡蓋魏徵之奏剴切而當帝心況李勃之言優游而中時病豈但嘉於諷議將有取於弼諧某濫處郎闈猥通朝籍喜承登侍從之列益告遠猷竊幸陪賓客之趨敢承善頌

賀姚大諫啟

熊子復

伏審特膺妙簡越踐要途疇稷契之忠言冠于諫省第

淵騫之德行錫於儒科柄任實諧輿情允屬恭惟大諫  
學該流畧而洞視萬古文類盤詰而勒成一家練本朝  
之舊章審當世之大務徧臨三輔早頒京輦之條擢寘  
六聯更貳儲闡之化將命既還於萬里陳謨益契於九  
重茲簡清衷遂䟽曠渥蓋蒼生待為霖雨姑令諫澤之  
霑而學者仰如泰山庸錫辭休之擢高步即登於輔相  
英聲益播於華戎某猥處冷漕阻陪下賓國家間暇方  
極論於政刑朝覲從容尚謹言於幽側



小坡司諫 正言

賀梁司諫啟

王龜齡

光膺宸命榮貳諫垣當朝廷多事之時承風俗積弊之後內有羣陰之壅蔽外仍強敵之侵陵可言不言而反諱大言既已比立仗之馬今日何日而不監前日其可忘覆轍之車幸遇正人適當言路固宜犯顏而首論大事豈可削藁而徒為小忠天子以為是而諫官以為非言有聞於前輩君子有所恃而小人有所畏正有賴於

明公庶幾無愧古者之七人斯可上繼堯朝之四諫某  
受知有素贊喜彌深輒猶狂瞽之言少為忠讜之助

賀湯司諫啟

洪景伯

輒自詞垣擢居諫省挺有祖烈獨高一代之才簡在帝  
心宜正七人之任真賢晉用公論益興恭惟司諫妙學  
際天英辭振古洗空萬古早自擢於殊科飛上九霄薦  
親承於異渥記注得謹嚴之體贊書追深厚之風果奉  
宸恩越當廷諍臧孫達弗忘諫而有後於魯已昭先世

之猷李百藥以時論而有光於唐即重本朝之勢某猥  
忝漕畫逖聽除音莫陪賓客之趨曷勝寤寐之喜

賀吳正言啟

光膺宸綍更踐諫垣聞命之初望風而躍竊以蕙蘭擢  
秀久幽而不改其芳鳳皇來翔一出則大驚於世而況  
君子獨安而處衆人皆謂之賢揚於朝廷宜在高位乃  
生靈之盛福實上下之相歡嘗聞士必貴於有為志先  
行其所學一失是非之辨終迷聲利之場言欲出而畏

憂氣益餒而阻喪發憤吐懣彼獨何人持祿養交寢成  
習俗惟大人之特立秉常德而不移於義也剛不可則  
止衆人紛驚懷著龜先見之明末路淹回挺松柏後凋  
之操屬明主之嗣服芘萬事之圖新數求多聞丕式元  
老方虛心於古訓俄仄席於讜言毅然容貌之堂堂是  
謂王臣之蹇蹇風節可畏足以厭難于未形議論敢前  
足以致君於無過此實德名之選大為邦國之光施膏  
澤於下民稍安輿論贊大鈞而播物行俟我公某猥以

微踪夙叨優眷限拘官守阻造台庭

賀沈正言啟

命錫詔除任司言責帝虛心而聽納人傾耳以聳聞某  
官賦受鍾竒進修毓德極高明而致廣大有憂天下之  
心立廉耻而抗直言無愧古人之節結知宸扆庀職憲  
臺歷時幾何馳譽籍甚序進七人之位得專四品之章  
削藁奉公欣衆正以開路伏蒲獻可待一言以興邦某  
猥守郡符冀懷寶謁聽朝陽之鳴鳳喜激懦衷附遠客

之雙魚誠緘柔牘

察院

賀毛察院啟

汪彥章

親奉詔除進居言責開衆正之路立太平之基結知方  
深有識相慶朝廷以數聞直聲為盛治之世君子以得  
行已志為光亨之時然下或依違而不能充上所求上  
或忌諱而不能窮下所學歲月忽焉已至功烈如此其  
卑求一舉而兩全曠百年而幾見若處盡言之朝而叅

風憲之任當正色之地而得人材之英惟時所推非公  
誰可恭以某官性合天道才周世資經術自為名家文  
章不隨人後傑立千百輩上一時爭慕於風流漂泊十  
五年間萬口皆為之歎息起自江湖之遠歸從鵷鷺之  
游廣庭纔望於清光即日立登於要路付柱後惠丈之  
事觀胸中雲夢之奇蓋嘗聞議論之崢嶸知能救風俗  
之頽靡當令藜藿之不採無致玉石之俱焚張膽明目  
於數步之間收功立名於萬世之後雖行藏豈不在我

恐彈擊非以處公即被褒嘉別躋禁近某雖羣甫爾承  
問欣然知公道之得人雖懦夫而爭氣春律晚晚臺網  
靖深願為清望以自持當有神明之陰相

賀齊察院啟

熊子復

伏審召自計臺復居憲府惠文彈治豈惟舊物之還侍  
從論思佇竣中司之擢有識交頌不謀同辭竊以邦憲  
總於一臺官儀峻於三院動無掣肘凜乎三岳之或搖  
進不違顏朗然雲霧之焉隔上聖方躬摠攬真賢付與



糾繩恭惟察院緼藉醇深規模閎博妙學淹貫通八索  
九丘之書雄文渾成全三光五嶽之氣回翔久矣恬養  
浩然早進察於三臺高懷永退果益隆於睿眷溫詔趣  
歸既臺閣之有光亦朝廷之增重督簡書於肅政姑舉  
彝章侍冕疏於未央即陪密命某猥分漕指逖聽除音  
莫同賓客之趨曷勝寤寐之喜

賀杜察院啟

翟公巽

伏審輟從冊府權領憲臺當乾坤清夷之時居山岳動

搖之地有識交頌不謀同辭自漢推三獨之雄至唐增  
六察之峻風凜臺閣霜凝簡書乃近輔之所儲豈衆僚  
之可擬恭惟察院聲華藉甚氣節凜然頃由蜀道而來  
遂出漢庭之右鑑明而塵垢不生鄙吝皆銷鼎鑄而魑  
魅莫逢奸邪自屏果繇老氏藏室之秘進列天家御史  
之雄某辱領使軺阻趨賓廡身自比稷契祖風已繼於  
少陵君庶幾成康世業願追於如晦

賀陳察院啟

趙德莊

伏審顯膺親擢越躍要途宸眷益隆尚需於綿歷臺儀  
方振更藉於推彈雖從橐之小稽亦朝紳之共慶竊以  
負全才者正須歷試將大任者不必驟遷且南宮箋翰  
之曹昔例陞於四禁而四府閱詳之職近多進於六聯  
豈其魁傑於等倫顧未飛騰於華邃蓋九重摠攬方沙  
汰於江湖謂三院峻雄可動搖於山岳正資彈劾少屈  
回翔恭惟察院蘊藉醇深規模閎遠榜中龍虎英名早  
冠於諸儒簡上風霜威望肅絕於羣辟是使朝廷之增

重豈惟蘭閣之有光金鑄鼎而察神姦力持正論雨作霖而蘓歲旱行贊大謀某夙侍光符欣傳華渚地靈人傑已肩慶厯之名賢墨妙筆精孰繼徂徠之嘉頌

賀周察院啟

陳仲思

入覲天光擢居風憲翳正人之獲用知公道之攸闕除目肆攷朝僉允協恭惟某官興邦巨哲高世名流期期抗直之風諤諤敢言之氣衣繡持斧素高擊斷之才攬轡登車惟有澄清之志懋攄賢業已著能名割十九牛

而刃若發硎擊三千里而風斯在下寓江湖之遠深懷  
魏闕之心闡鬼神之疑遂膺宣室之召載疇時望允賴  
辰猷親逢不諱之期屹若正色而立明目張膽何狐狸  
之足抨聚精會神要藜藿之不採豈惟動山岳之重益  
將施竹帛之光庸見設施進聯宥密某受知惟舊聞命  
云初廣廈萬間喜庇身之有所尺書千里恨趨慶之無  
階歲寧崢嶸臺綱暇豫願益加於調嗇庸上副於眷知

中司

賀余中丞啟

陳仲思

顯膺天詔進長霜臺恩禮並隆知神明之眷遇紀綱大振見賢哲之施為渙汗初頒師言僉穆恭惟中丞誠信行已正直秉心發學古之大猷展濟時之遠業著龜先見松栢後凋以昔歲回翔久蔚士林之望故頻年騫翥益為賢路之先自簡注於清衷宜踐揚於華貫典司風憲分判忠邪冠劔在庭常聳瞻於正色冕旒當宁每嘉納于直言茲由橫榻之雄就拜專席之貴正茲蹇諤協

贊盛明中外聞風至舉觴而交慶邇遐慕義願執箒以  
相依既徧更耳目之司將進陟股肱之任某夙親庇誨  
特荷記憐遠聞除目之騰寶倍常情之喜棲身燕厦念  
方託於帡幪引領龍門異即歸於鑪冶

賀余中丞啟

王瞻叔

伏審疏恩九陞總憲一臺正色以糾官邪方資重望同  
心而維國是更藉遠猷宸眷甚隆師虞允穆恭惟中丞  
蘊闕深之度挺諒直之姿文有老成之波瀾政多儒雅

之緣飾冠雋驪而特異被睿簡以彌優掌郎奏於四方  
倏奉席前之問舉臺儀於三院歷升柱從之司丞承渥  
於楓廷肆執綱於栢寺生白簡之風彈擊無畏重烏臺之選  
威望自持束縛有才按治皆服屬南北兩朝之交好願  
東西二府之久虛持獻無易存誠已擅當官之譽在時  
有臣若扈佇恭佐帝之勲某幸託餘光欣聆異數傳標  
循吏雖慚龔遂之能頌美賢臣尚繼王褒之作

賀朱中丞啟

陳君舉



命播楓宸位尊柄府幾年弄印上曰無以易堯一角我  
冠仕者皆嚴憚黜幅員相語紀綱畢張某官天壤飛英  
山川稽瑞適堯舜之正道首顏閔之高科茹古涵今後  
學者有所統弼中彪外諸大夫皆曰賢若時題品之公  
自奮功名之會振爭臣七人之職踐御史三院之班志  
在擊邪如鷹鷂之逐鳥雀事先去甚當豺狼不問狐狸  
奉簡以聞垂紳皆振積此立朝之望隱然執法之除虛  
位揖第一人具瞻獨坐籠街過三百步孰敢並行少倚

風霜實階霖雨某獲觀除目偶伉塵容因筆墨以貢辭  
情均照屢相簪裾之贊喜望隔龍門

賀王中丞啟

洪景伯

伏審誕揚制綽陞總憲綱上方悼於天倫覽萬機而未  
置中丞疇於人望眷三獨以先除播告邇遐聳動觀聽  
竊以虎豹在山而莫採於藜藿立朝久賴於孤忠豺  
狼當道而焉問於狐狸報國宜攻於巨蠹故正士端人  
之至剛而無憚雖賢臣宿將有咎而不容共高舉世之

能宜副久虛之任恭惟中丞氣嚴而中裕體邃而外沖  
初對楓宸若景星鳳皇始見也逮陞栢府如嚴霜烈日  
可畏哉非堯舜而不陳以稷契而自比果由橫榻進踐  
中司方殊鄰莫測於深情而當寧正圖於遠畧昔遊東  
國嘗陳選將相之方今長南臺當先論制邊疆之要某  
猥嬰塵鞅阻拜崇墉金鑄鼎而察神姦已破朋邪之膽  
雨作霖而蘇歲旱即寬黎庶之心

賀汪中丞啟

王宣子

伏審擢由上意進領中司主聖臣賢慶風雲之胥會乾  
清坤肅仰霜隼以橫秋華夏聳觀廟堂增重恭惟某官  
高明傑出剛毅自持義急濟時魯仲連乃天下士而非  
國士忠期衛上漢絳侯實社稷臣而非功臣玉立不移  
金聲益震方聖天子虛佇之久正大丈夫彈擊之秋倘  
顏跖是非之分雖堯舜聰明而莫治所以如鷹鷂之  
逐鳥雀曷常舍豺狼而問狐狸白簡飛霜正止落金吾  
之膽丹心照日又復寢淮南之謀九重深鑒其孤忠一

旦驟陞於獨坐屬廷臣之抗義慮邊備之未籌爰出勇  
冠宣威虎帳以身許國不擇地而安之惟帝念功無出  
公之右者大厦政須於梁棟巨川實賴於舟航赤舄興  
歌誰謂周公之久外清風入頌式觀山甫之遙歸某叨  
出師門欣聞書贊跡既縻於庠序心竊仰於旌麾黃麻  
之似六經行觀召拜洪鈞之轉一氣願入陶鎔濁火徂  
流涼飈屆典顓精調於鼎食用大副於巖瞻

賀余中丞啟

張舜民

光膺帝制榮總憲綱除命四馳師言叅允恭惟某官才  
周治體識造幾先直氣干霄懿文經國圖書三閣長冊  
府之俊髦爭臣七人冠諫垣之風采民瞻尚鬱宸眷益  
隆若諧執法之求無易秉彜之操霜凝白簡冰照紫宸  
糾繆繩愆優處紀綱之地經邦論道佇躋丞弼之司某  
方領藩條莫偕賓次永瞻旌榮難盡話言

賀侯中丞啟

趙德莊

顯膺帝制肅振朝綱輟從大諫之聯付以執法之任

德賢居要惟衆同歡恭惟某官受才高明履行純固道  
無少貶有孟氏之責難言欲必行若晏嬰之獻可會逢  
熙旦服在近途當雷霆之至威補日月之無過名聲藉  
甚風烈挺然果繇衆正之開更賴一臺之理上以衡持  
於國是下焉繩糾於官邪說行如流毋廢沃心之益義  
形於色潜消落膽之姦方隆九鼎之安佇席三槐之拜  
某遠銜明命久蔭餘波雕鶚橫秋但聳藩籬之望山林  
伏猛庶全藜藿之生永言欣愉實倍倫等

賀辛中丞啟

劉共父

伏審顯膺詔綽晉統憲基惟明主可以盡言既賴納忠之益而仁人宜在高位果膺不次之除凡有識知孰不欣頌某官氣和而毅才大以周邁往絕俗之姿盛世咸知夫仰德獨立不懼之勇懦夫猶激於聞風秉一節以弗渝甘三已而無愠宜知簡於宸扆亟入冠於忠文搏擊何心聳逢秋之鵬鶚姦邪禡鬼無當道之豺狼草木亦知其名藜藿為之不採峻躋執法允愜僉言得李勉而



朝廷為尊益上當於帝意舉臯陶而不仁者遠即叅穆  
於政途某臃腫無堪矜竦寡與頃備員於淮右獲仰託  
於使華誤逢三語之知己卜終身之遇逖聞成命彌激  
愚衷鳳皇之鳴朝陽宜羣心之胥慶燕雀之賀大厦幸  
末路之有歸

南牀

賀余侍御啟

石守道

疏恩北闕峻陟南牀國有正人益洗心而粹擢民欣素

望咸近頸以觀瞻伏惟歡慶竊以耳目之官紀綱是任  
勇冠振職烈若風霜之嚴烏臺馳聲迅如鷹隼之擊矧  
茲要職素號臺端豈惟使人避公雅之聰又且彈奏落  
祐甫之膽肆求荷任見屬賢明恭惟某官浩氣沖剛懿  
文外蔚學通古始讀三墳五典之遺書識究淵源擅萬  
戶千門之博物踐揚滋久譽處彌休上心嘗器其能士  
論孰出其右擢司言路獨秉憲綱正色立朝堂堂不撓  
嘉猷告后炳炳如丹緊直聲之數聞宜經綸之薦及青

囊增重黃閣非賒僉論攸歸斯言可必其夙蒙厚顧逖  
企英標益深賀燕之誠俄動趨螽之態風颺寢爽崇仍  
正遙願精保於冲和用仰符於眷倚永言頌詠拙俞端  
倪

賀單侍御啟

石守道

伏審光膺宸綽進總臺綱達公論於九重屢聞繩肅亞  
官儀於三獨益見寵褒除目初傳輿情相慶竊以萬幾  
重大既親摠攬於法宮百辟衆多必賴推彈於憲府維

時南榻實次中司得賢哲則自然致朝廷之尊去姦回  
則孰不有簡書之畏方清衷之圖舊宜宿望之攸陞恭  
惟侍御識蘊高明氣涵剛大興學兼通於世務嘉猷允  
合于帝心果自副端峻登柱史方共持於國是豈特密  
於官邪某濫處郎闈猥通朝籍敢親持於竿牘用贊喜  
於門牆風采動一時已致班行之肅精神折千里佇躋  
弼亮之崇

賀尹侍御啟

程養正

疏榮北閣進直南床風采聳聞朝廷增重某官學窮元  
本識造幾微言天下事若素宦於朝起自徒步謂大丈  
夫當正色之地必奉明恩直聲既振於烏臺寵眷益隆  
於丹宸霜凝白簡風入花驄暫嚴綱紀之司即付樞機  
之任某遡風茲久聞命云初鵬鶚橫翔方擊秋天之上  
荆棘無簡實藉慶雲之餘欣頌之私敷實奚盡

賀李侍御啟

汪彥章

伏審載筆螭頭久罄論思之益乘驄烏府妙膺清要之

除綸綍甫頒搢紳胥賀恭賀某官學博而體要色粹而  
氣剛夙懷康濟之謨寢被聖神之眷升都公之峻職擢  
右史之高班聞望益隆典刑可仰宜中沼見知於旒冕  
茲南床果畀於英髦遂兼三院之魏獨處一臺之長蓋  
勢力能排於山岳故威稜素厲於風霜益增朝野之清  
明克輔版圖之恢復某久蒙德庇快覩除書屬郡政之  
坐拘阻賓階而趨慶喜而不寐初聞郵置之傳道之將  
行即副岩瞻之望

副端

賀尹殿院啟

胡長義

顯揚宸渥進貳臺端聖天子銳取以精求士大夫喜聞而樂道驛音四出風采益新恭惟某官考道以心博學而粹功名乃其自許富貴為之鼎來豈徒袞袞從諸公臺省之登蓋將疊疊為天下社稷之計以綱紀之地必得其職於耳目之官當有所司峭直敢言詎肯作尋常苟且之語職業必舉未嘗萌畏忌顧望之心茲鷹隼方

擊之秋正狐狸安問之日有謨猷入而告后恐彈擊非  
以處公眷倚既隆奮庸益峻某欣聆嘉命喜倍常情燕  
雀何知惟大厦而為賀桃李可慕豈成蹊之無因

賀陳殿院啟

沈德和

伏審肅膺宸綽榮陟憲臺除目傳聞僉言交慶恭惟某  
官懿文華國盛德表時才應物之無窮學造理之至妙  
亨衢特立峻節自持執法殿中典書柱下繩愆糾繆開  
治世之忠言激濁揚清起懦夫之立志行圖績用對揚



休嘉某久庇德輝早聯桂籍側聞成命莫展慶儀雖深  
懼忤之私第切傾依之念

賀單殿院啟

熊子復

伏審誕頒制綽擢貳憲綱言路方虛用獨扶於國是治  
朝既正宜永絕於官邪簡書有光頌嘆無數竊以作大  
章付一夔而足奚取多為建長策致三代之隆要皆罕  
及今臺諫之員尚缺蓋聖明之選惟艱當使人皆曰賢  
是故官不必備恭惟殿院氣嚴而中裕體邃而外冲才

可致君自許稷契之比學能幾聖抑在軻雄之間栢歲  
寒而不凋草疾風而尤勁聯華六察早膺親擢之榮疏  
渥十行果踐副端之峻豈特資於彈擊實有藉於彌縫  
由階而升直拱以俟某頃緣愚拙每荷慈憐既幸窺老  
成之典刑知能救今日之風俗編摩曷既景慕徒勤

賀張殿院啟

洪景伯

伏審榮膺鼎眷峻陟副端置局司文顙操謨錄建臺肅  
政進預抨彈嗣皇方繼於離明端士宜承於晉用有識

交贊不謀同辭竊以漢能寢淮南之謀本登於直諫唐  
欲去河北之賊在察於朋邪益以進有德則朝廷必尊  
難任人則蠻夷自服苟臺綱之內振何邊瑣之外虞視  
古有光於今為重恭惟殿院挾鯁諒之氣秉雄剛之才  
游夏淵源自得孔門之要卿雲黼黻早魁蜀道之英感  
會聖時究舒賢蘊晝嘗聞於三接歲遂見於九遷果陞  
殿內之聯叅總臺中之務豈止資於彈擊正有賴於圖  
回某幸託餘光欣傳成命方行原隰阻拜門牆太宗自

舉行成聊抗簡書之論元齡乃引如晦即陪廊廟之謀



五百家播芳大全文粹卷十二